



# TEKS UCAPAN

**YB DATO' SRI HASAN BIN MALEK**

**MENTERI PERDAGANGAN DALAM NEGERI,  
KOPERASI DAN KEPENGGUNAAN**

**MALAM APRESIASI DAN KECEMERLANGAN KPDKKK 2014**

**13 JANUARI 2015 (SELASA)**

1. Alhamdulillah, marilah kita memanjatkan rasa syukur ke hadrat Allah SWT kerana dengan limpah kurnia dan izin-Nya, kita dapat berkumpul pada Majlis Malam Apresiasi dan Kecemerlangan KPDKKK 2014.
2. Sesungguhnya Malam Apresiasi dan Kecemerlangan ini merupakan pengiktirafan dan tanda penghargaan kepada tuan-tuan dan puan-puan yang telah memberi sumbangan tenaga dan idea kepada kementerian sepanjang tahun 2014.
3. Siang tadi, kita telah meraikan 238 warga kementerian yang menerima anugerah perkhidmatan cemerlang kerana kecemerlangan mereka dalam melaksanakan tugas pada tahun lepas.
4. Saya berharap majlis pada pagi tadi dan juga pada malam ini akan memberi semangat kepada tuan-tuan dan puan-puan untuk bekerja lebih komited dan berintegriti. Pada saya, integriti membawa maksud "*it is about doing the right thing, the right way, at the right time and right place, with the right people and for the right reasons.*"

Tuan-tuan dan puan-puan,

5. Kerajaan pimpinan YAB Perdana Menteri, Dato' Sri Mohd Najib Tun Abdul Razak telah mengorak langkah memperkenalkan pelbagai inisiatif baru yang berani, bagi melonjakkan ekonomi negara ke tahap yang belum pernah lagi tercapai. Melalui Pelan Transformasi Negara, Pelan Transformasi Ekonomi dan Model Baru Ekonomi, semangat dan usaha digembung secara bersepada dan tersusun, ke arah menjayakan hasrat dan aspirasi yang sama, iaitu mentransformasikan negara kepada sebuah negara maju yang berpendapatan tinggi sebelum menjelangnya tahun 2020, yang hanya tinggal lima tahun.

6. Kejayaan agenda transformasi ini pastinya menuntut supaya kita beralih daripada paradigma lama, bagi membentuk budaya baru yang mengutamakan inovasi dan penciptaan serta pemerkasaan intelektual dan profesionalisme. Budaya lapuk perlu dipinggirkan sambil meneroka bidang-bidang baru melalui kekuatan iltizam dan perubahan dalam cara berfikir dan bertindak.

7. Tidak akan ada transformasi negara jika tiada transformasi minda di kalangan masyarakat terutama penjawat awam. Pemikiran kelas ketiga menyebabkan malas bekerja, suka membuang masa, membuat kerja dengan berlengah dan sambil lewa tetapi minda kelas pertama mempunyai daya fikir tinggi dan sentiasa berusaha melakukan kerja dengan cemerlang.

Tuan-tuan dan puan-puan,

8. Kita perlu memastikan KPDKN berada di landasan yang kukuh, mantap dan berkesan. Usaha memperkemas jentera organisasi perlu dilaksanakan dari semasa ke semasa. Sumber yang mapan, struktur organisasi yang kemas, kewibawaan modal insan dan memaksimumkan potensi yang ada merupakan faktor-faktor penting penentu kecemerlangan KPDKN di masa hadapan tanpa mengetepikan aspek kerjasama dan permuafakatan.

Berat sama dipikul  
Ringan sama dijinjing  
Yang tidak ada sama dicari  
Sama sakit sama senang  
Ke bukit sama mendaki  
Ke lurah sama menuruni  
Sama menghayun sama melangkah  
Jika khabar baik diberitahu  
Jika khabar buruk serentak didatangi  
Jika jauh ingat mengingat  
Jika dekat temu menemui  
Dapat sama laba  
Hilang sama rugi

9. Saya yakin transformasi yang akan dilaksanakan berupaya menjadikan KPDNKK sebagai kementerian yang disegani dan dihormati di masa hadapan.

10. Saya mengucapkan setinggi-tinggi penghargaan dan terima kasih kepada pihak urusetia yang telah menganjurkan Malam Apresiasi dan Kecemerlangan KPDNKK 2014.

Dengan lafaz Bismillahirrahmanirrahim, saya merasmikan Malam Apresiasi Dan Kecemerlangan KPDNKK 2014.

Sekian, wabillahitaufik walhidayah wassalamu'alaikum warahmatulahi wabarakatuh.